

豫章叢書

第一四〇冊

張

華

英

書

第 一 冊

雪坡舍人集卷六

宋新昌 姚勉 著

從子 龍起 編

牋

宮僚賀皇后冊太子牋 庚申兼舍人時作

寶圖光啟由闕睢王化之基玉冊誕揚重燕翼孫謀
之命慶流宮壺福在宗祧 中賀 恭惟皇帝殿下坤體

順承家人正吉塗山聖德宜乎繼禹道之能賢大妣
徽音所以有武王之爲子贊成睿斷允出母儀永爲
萬世之規茂介兩宮之祉臣等備員儲案拭目景光

寶爲千一之逢曾蔑萬分之助器歸長子已紆漆室
之懷壽祝聖人願效華封之請

宮僚賀皇太子受冊牋

天子當陽肇舉建儲之禮王言作命聿嚴奉冊之儀
神悅人和禮明樂備宗祊有慶中外屬心

中賀恭惟

皇太子殿下粹質金相淵姿玉裕主器莫若長子有
宗廟匕鬯之責存遺寶以紹天明有室堂菑播之任
在顯膺瑞玉端秉植圭丕煥前星拱承北極某等濫
聯宮案欣覩上儀奉琬珉而涖東宮幸際百年之曠
典從青蓋而朝太室聳聆兆姓之歡聲

宮僚謝皇太子賜宴牋

星暉海潤位新正於東宮露湛陽晞恩共承於北

以燕以衍爲龍爲光

中謝

竊以建元良者所以垂萬

世之基示慈惠者所以侈一時之典置酒而侍必商
山園綺之流給膳以珍在瀛洲房杜之彥某等猥非
妙選曷稱盛儀茲蓋恭遇皇太子殿下視膳孝隆主
恩任重酌道之源覈仁之數傳聖上訪儒之心由義
之路入禮之門得君子招賢之正推枕樂與執饋載
親不遺宮采之微俾與賓筵之秩某等餐和甚至醉
德惟醲樂鳴鹿之蒿萃不知所報撤鮑魚於俎豆願

竭此忱

賀皇太子正位牋

伏審肇建諸宮於昭盛典聖人以天下爲大器爰重
詒謀宗祀饗上帝於明堂聿嚴主鬯拜家有慶運祚
無疆

中賀

恭惟皇太子殿下文明溫恭孝友仁愛乾

稱父坤稱母允爲宗子之賢月重輪星重輝咸仰副
君之德舜守帝堯之道一文朝王季者日三心謀大
同天廸從保某猥承鳳詔入侍龍樓愧無贊道之文
未稱承華之選惟君子命惟君子使誓當殫羽翼之
忱與正人居與正人游願益就高明之學傾心懇切

拜手敷陳

除舍人供職謝皇太子牋

賢聖仁孝聞天下方新謀燕之詒左右前後皆正人
有賴朋龜之益若爲膚謏誤入選掄

中謝

伏念某曩

玷微科未酬異渥馳心魏闕每懷漆室之倚楹厠迹
石渠忽尾商山之侍宴願忠雖切揣分無堪茲蓋恭
遇皇太子殿下問道承師敬賢好士春學千秋學羽
時敏厥修史誦詩工誦箴日聞者正遂令孤陋亦廁
羣賢某愧乏奇才幸非曲學近周召之賢則善所望
親仁非堯舜之道不陳是爲效報

謝皇太子賜馬牋

學務時修獲侍潛龍之邸禮隆晝接特承用馬之恩
揣分未堪抃心重愧

中謝

竊以載驂載駟君子來朝

乘牡乘黃在公載燕畀之五良者見其好善予之駟
牡者所以褒功若爲一介之微得御六閑之駿茲蓋
恭遇皇太子殿下珠庭質粹金輅望新以駿馬不獻
東宮爲賢以龍樓不絕馳道爲孝前明師後勸講樂
豈銜縶之間趣肆夏步采齊行有鸞和之節念茲驚
蹇乘以馭馵某敢不恭侍羈欽承鞭策述德車樂
御之理講帝驟王馳之方命彼載之道敢辭於云遠

薄言駟者思願一於無邪

沂邸賀皇后立太子牋

庚申兼宮教時作

坤道資生爲天下母震宮主聰乃聖人男九廟奠安
三靈闡懌中賀恭惟皇后殿下塗山興姒簡狄生商
衍國家之慶源贊宗社之大計若昔昭陵建嫡式由
光獻之功高廟定儲允出憲聖之助承天與予視古
有光臣忝列近藩獲觀盛典龍樓致孝益隆保護之
恩燕翼詒謀丕享延洪之福

沂邸賀皇太子受冊牋

前星正位震器有歸暈日開祥離明繼照一人有慶

萬國同驩

中賀

恭惟皇太子殿下徽柔懿恭溫良寬

裕謳歌曰吾君之子亦既有年賢聖繫天下之心久
孚眾望肇正儲位益隆我邦某忝屬宗藩喜聞典冊
萬年受天之祐在致孝忱三代有道之長願親端士
沂邸賀皇后太子入宮牋

坤宮主靜在母不煩甲觀儻功翼子以燕三宮忻慶
九廟安寧

中賀

恭惟皇后殿下齊體紫宸儷尊皇極

椒塗壺壁式開宜眾之祥花繞禁庭昭受問安之禮
立承華於近闕名繼照以爲堂某忝列宗藩實深厦
賀親闈密勿龍樓 日致之忱予職恪共鳳罍上天

齊之壽

沂邸賀皇太子入宮牋

肇建春坊聿新甲觀滂雷爲震位爰正於在東前星
近心辰載瞻於拱北神人交慶朝野同龢中賀恭惟
皇太子殿下處已溫恭傳家忠厚學益躋於聖闕孝
恪奉於親闈體元將以長人仁爲安宅朝日以明有
敬禮乃入門密依紫禁之天丕闢青宮之地某鳳麟
屬近燕雀情深館有弘文知己妙俊英之選苑無博
望斷不聞賓客之私

雪坡舍人集卷六

雪坡舍人集卷七

新昌 姚勉 著

從子龍起 編

策

廷對策 寶祐癸丑科

臣對臣恭惟皇帝陛下十詔賓興九臨軒御求賢靡
倦博採芻蕘茲者進臣等於廷策之以選舉之八事
而欲得夫學術才智之二者以扶世道真堯舜之用
心也臣來自遠方懷忠欲吐意陛下必策之以當世
之務理亂安危之機而聖問所及乃止於此其慮臣

等觸時諱而不使之言乎抑慮臣等有待對之帖括而問其所不備乎甚非策士之本意也雖然人才亦國家之重事陛下求學術者則欲其達性命而學聖賢挺氣節而發言議求才智者則欲其理國家而究民事裕邦計而捍邊陲亦皆時政之大者臣敢因陛下之問而條其所以對然後以臣所欲言者爲陛下言之惟陛下試垂聽焉臣聞求天下之士以文不若淑天下之士以道以道而淑天下之士正其心也以文而求天下之士蠱其心也上帝降衷蒸民有則孰非良心善性之賦惟民生厚因物有遷則教之者非

其道耳中庸曰天命之謂性率性之謂道修道之謂教
言古先聖王所以教天下者惟修其性中之道也大學
曰大學之道在明明德在親民在止於至善言古先
聖王明其心之明德以新天下之民而皆止於義理
之極也古之所以淑天下者如此自鄉舉里選首廢
於周而策士有科始見於漢旣非古意矣猶未至以
詞章也隋唐以來始有進士科目之誘旣設利祿之
習亦牽然後天下之士愈不知所謂道心術日壞以
至於今士習之趨猶唐舊也雖然變今之士習臣猶
以爲易致力焉何也自孔孟絕響以來士不知道隋

之世惟一王通唐之世惟一韓愈然皆得聖門髣髴
莫造斯道之精微如通以聖人之心迹有殊愈以人
之性有三品其於聖道皆昧指歸學道之士且然而
况科目之士故士習難猝變焉天開我朝道統復續
藝祖皇帝問趙普曰天下何物最大普對曰道理最
大此言一立氣感類從五星聚奎異人間出有濂溪
周惇頤倡其始有河南程顥程頤衍其流有關西張
載翼其派南渡以來有朱熹以推廣之有張栻以講
明之于是天下之士亦畧聞古聖人之所謂道矣雖
爲科目之學盡其心術而道學之功每從而救之識

之明者亦多覺焉臣故曰變今之士習爲易使上之人不專以文求天下之士而專以道淑天下之士則學術才智之士宜出而爲國家用矣陛下聰明天錫問學日新接堯舜精一執中之傳得孔孟中庸大學之旨陛下可謂知道之君矣抑臣猶願陛下推是道以淑天下之士也而陛下之所以策臣者則未免於文爾是非所以淑天下之士也教之無素求而得之者亦陋矣間有能爲天下用者亦天資暗合耳豈以道用天下之士哉古之盛時自八歲入於小學其所學則洒掃應對進退之節也禮樂射御書數之藝也